



Sesida dals

Communitgà il

Protocol nr.

31 d'avust 2021

1. da settember 2021

799/2021

Dumonda Horrér

concernent contracts da garanzia en connex cun la sentenza dal Tribunal federal
2C_523/2020 dals 4 da november 2020

Resposta da la Regenza

– cun recusaziun dal cusseglier guvernativ Christian Rathgeb –

En il chantun Grischun vala in secret fiscal sever (art. 122 da la Lescha da taglia per il chantun Grischun [Lescha da taglia, LT; DG 720.000]). Ultra da quai na vegn la Lescha davart il princip da trasparenza (Lescha da trasparenza, LCTrans; DG 171.000) – tenor la regulaziun expressiva da l'art. 122 al. 4 LT – betg applitgada en chaussas fiscalas. Dumondas davart pajataglias concrets na pon perquai betg vegnir respundidas.

Tar la dumonda 1: Pervia dal secret fiscal na poi betg vegnir prendì posiziun davart l'autezza da pretensiuns da taglia avertas. Questas pretensiuns (taglia sin las entradas e sin la facultad) èn vegnidas bilantschadas en il quint annual 2020. Ultra da quai è vegnì furmà in delcredere (post collectiv), perquai ch'il mument dal pajament è avert.

Tar la dumonda 2: Differentas aczias èn vegnidas sequestradas. Pervia dal secret fiscal na poi betg vegnir communitgà, quant aut ch'il chantun valitescha questas aczias.

Tar la dumonda 3: Il chantun ha fatg diever da tut ils instruments ch'el ha per sur-vegnir ils daners da taglia debitads, ed el vegn a far quai er en l'avegnir.

Tar la dumonda 4: L'Administraziun federala da taglia, l'Administraziun da taglia dal chantun Grischun, l'Administraziun da taglia da la citad da Cuira e l'Uffizi da taglia dal chantun Turgovia sco crediturs sco er Remo Stoffel sco pajataglia/depositur han incumbensà il cusseglier dals chantuns Martin Schmid sco conservader da las aczias da trais societads che vegnan dominadas da Remo Stoffel. Plinavant han las partidas fixà ch'il contract constitueschia in dretg da pegn dals crediturs envers las aczias depositadas. Sco cumplettaziun han duas da questas societads sco deposituras e l'Administraziun federala da taglia, l'Uffizi da taglia dal chantun Turgovia e l'Administraziun da taglia dal Grischun sco crediturs sco er il cusseglier dals chantuns Schmid sco agent da sequestraziun fatg in contract da sequestraziun. Tuttina sco en il contract davart il deposit d'ina garanzia sa tracti en quest connex mo d'in deposit da las aczias da questas duas societads tar il cusseglier dals chantuns Schmid sco conservader.

La valitaziun da las aczias depositadas vegn fatga da l'Administraziun da taglia dal Grischun senza intervenziuns dal cusseglier dals chantuns Schmid.

Envers l'Administraziun da taglia dal Grischun e davant differentas instanzas da meds legals n'è betg sa preschentà il cusseglier dals chantuns Schmid, mabain èn cumparids tschintg represchentants fiscals extrachantunals da Remo Stoffel.

Tar la dumonda 5: Tenor il contract davart il deposit d'ina garanzia menziunà qua survart è il cusseglier dals chantuns Schmid conservader da las aczias da trais societads anonimas che vegnan dominadas da Remo Stoffel (cf. risposta a la dumonda 4). En questa funcziun na daventa el betg activ cunter il chantun Grischun. Anzi, el guarda da conservar las aczias per garantir las pretensiuns da taglia en l'interess da l'Administraziun federala da taglia sco er da las Administraziuns da taglia dals chantuns Turgovia e Grischun sco er da la citad da Cuira.



En num da la Regenza

Il president:

Dr. Mario Cavigelli

Il cancellier:

Daniel Spadin